

敬自致得成爲三界尊佛說經已時諸菩薩
比丘比丘尼優婆塞優婆夷莫不歡喜作禮
而去

佛說睽子經

佛說九色鹿經

吳月支優婆塞支謙譯

佛言昔者菩薩身爲九色鹿其毛九種色其
角白如雪常在恒水邊飲食水草常與一鳥
爲知識時水中有溺人隨流來下或出或沒

得著樹木仰頭呼天山神樹神諸天龍神何
不愍傷我也鹿聞人喚聲即走往水邊語溺
人言汝可勿怖汝可騎我背捉我角我相負
出上岸鹿大疲極溺人下地遶鹿三匝向鹿
叩頭乞爲大家作奴給其使令採取水草鹿
言不用卿也且各自去欲報恩者莫得道我
在此間人貪我皮角必來殺我於是溺者受
教而去爾時國王夫人夜夢見九色鹿意欲
得其皮角即託病不起王問夫人言何以不
起夫人答言昨夜夢見非常鹿其毛九種色

其角白如雪我思得其皮作衣裘其角作拂
柄王當爲我得之王若不得我當死矣王告
夫人汝爲且起我作一國王何所不得王即
便募於國中若有能得九色鹿者當與分國
治賜其金鉢盛滿銀粟賜其銀鉢盛滿金粟
溺人聞王募重心生惡念我說此鹿可得富
貴鹿是畜生死活何在便語募人言我知有
九色鹿處募人便將至王所言此人知有九
色鹿處王聞大歡喜王言汝得其皮角來報
之半國於是溺人面上即生癩瘡溺人言此

鹿雖是畜生大有威神王宜多將人兵乃可
得耳王即大出人兵往恒水邊鳥在樹上遙
見王人衆來疑當殺鹿即呼鹿言且起王來
取汝鹿故熟卧不覺鳥復言知識且起王將
兵至鹿故復不覺鳥便下樹居其頭上啄其
耳知識且起王兵圍汝數重鹿方驚起四顧
望視無復走地便往趣王車邊傍人引弓欲
射之王告莫射此鹿此鹿非常將是天神耶
鹿即言莫射殺我假我須臾我有恩於國王
問有何恩我曾活王國中一人即長跪重問

王誰道我在此王言車邊癩面人也鹿舉頭
看此人眼中淚出不能自勝大王此人本溺
在水中隨流來下或出或沒得著樹木仰頭
呼天山神樹神諸天龍神何不慙傷我我時
不惜此命自投水中負此人出本要誓不相
道人無反覆不如水中浮木也王聞鹿言有
慙愧色我民無義王即三教其民奈何奈何
受恩反欲殺之王即放鹿使去下國中若有
驅逐此鹿者當誅汝五屬於是王便還宮鹿
歸故處是時國中衆鹿皆來依附數千爲群

永不見害共飲食水草不犯人菜穀從是之
後風雨以時五穀豐熟民無疾病其時太平
畢命化去佛告諸弟子菩薩所行雖處畜生
不捨於慈人獸並度是時夫人者孫陀利是
也是時烏者阿難是也是溺人者調達是也
時鹿者我身是也調達與我世世有怨阿難
有至意得道菩薩更勤苦行羣波羅蜜忍辱
如是

佛說九色鹿經